

[Dowers Blog](#)

Ministerio di Husticia y Enseñansa

« [Emmaschool a gradici minister Dowers a e renovacion MINISTER DOWERS A ANUNCIA CAMBIONAN GRANDI PA MEHORA SERVICIO DI RIJBEWIJS](#) »

Segun Sra. Enid Croes-Marugg, di “Fundacion pa Combati Molester di Zonido”: MOLESTER DI EXCESO DI ZONIDO PRONTO LO POR PERTENECE NA PASADO

February 9th, 2011 at 22:58



Den despacho di Minister di Husticia y Enseñansa miembronan di Fundacion pa Combati Molester di Zonido a tene un conferencia di prensa acompaña pa Minister Arthur Dowers, hefe di Polis Sr. Dolfi Richardson y Dominico Werleman director di Dienst Technische Inspectie (DTI). Meta di e conferencia di prensa tabata pa miembronan di e ‘Fundacion pa Combati Molester di Zonido’ haci entrega di 4 aparato di midi zonido (Sound Level Meters) como donacion na Cuerpo di Polis di Aruba.

Representando e fundacion tabata Sra. Enid Croes-Marugg y Micheal Bareño cu a haci entrega di e aparatonan na Minister Arthur Dowers kende na su turno a haci entrega di e donacion na hefe di KPA, Sr. Richardson. Segun Sra. Croes-Marugg,

presidente di e fundacion, e aparatonan aki ta pa "midi of constata e zonido su altura". E idea ta pa KPA por uza e aparatonan aki pa asina haci nan trabou mas efectivo. Na Aruba tin hopi problema cu molester di zonido (geluidsoverlast) pero hopi biaha no por cuantifica esaki pa Polis por haci nan trabou efectivamente den e tipo di casonan aki.

Segun Sra. Croes-Marugg, e fundacion a keda forma na aña 2008, despues cu "un grupo preocupa cu e molester aki ta cogiendo mas y mas plasa den nos comunidad." E presidente di 'Fundacion pa Combati Molester di Zonido', a sigui splica cu "nos tabata kier den nos metanan, pa garantisa tranquilidad na cas, scol y tambe na trabou." Segun e representante di e fundacion, tin hopi reclamo ariba zonido excesivo den nos comunidad. No mester lubida cu exceso di zonido por ta un causa di, daño na 'trommelvlies' y tambe por causa perdida di oido.



Despues di un sondeo profundo, tende y scucha diferente conseho di expertonan den e ramo a scoge pa cumpra 5 sound lever meters HD600 y nan calibrador corespondiente pa por midi efectivamente exceso di zonido. Cu esaki e fundacion ta spera di por a contribui na conscientisa nos comunidad riba e molester aki y ta spera cu molester di zonido lo pertenece na pasado.

Di parti di Minister di Husticia, Sr. Arthur Dowers despues di a yama un y tur bon bini a conta con algun tempo atras e la haci conoci cu e fundacion y tuma nota di nan entusiasmo pa aporta na bienestar di nos comunidad. Segun Minister Dowers e ta aprecia hopi e tempo y dedicacion cu e fundacion a hinca den e proyecto aki. Sr. Dowers a sigui splica cu tempo cu e fundacion a acerca nos, "nos a bisa cu nos ta mire como algo sumamente necesario y bon pa nos comunidad." Di parti di gobierno, Polis y DTI a sigui busca consehonan pa asina cu "na final di dia ora cu nos bay midi cu esakinan pa nos haya datonan for di dje, cu ta datonan confiabel," cu por ehempel por wordo uza exitosamente den situacionnan huridico. Pero un aspecto cu e Minister ta haya hopi importante ta cu e iniciativa aki ta un bon manera pa conscientisa pueblo en general ariba e peligranan di zonido excesivo, pero tambe con duro cierto situacionnan ta di berdad. E risiconan por tin repercusionnan serio pa por ehempel costo di AZV y salud en general.

E aparatonan awor ta den man di Cuerpo Policial y segun Sr. Richardson, nan lo bay den un proceso di training, cu ayudo di tanto den fundacion como DTI. Ta spera cu e uzo di e aparatonan di midi zonido lo ta den uzo den un masha poco tempo.

Posted by [admin](#), in [Gobernacion 2009-2013](#), [Husticia](#)

Comments are closed.

Dowers Blog is proudly powered by [WordPress](#)
Theme: [RCG Forest](#), by [Rui Carlos A. Gonçalves](#)